

Pàigheadh Ciorraim Cloinne

Dè th' ann am Pàigheadh Ciorraim Cloinne?

Is e airgead a bharrachd a th' ann am Pàigheadh Ciorraim Cloinne a chuidicheas leis na cosgaisean a bharrachd a tha an lùib cùram a thoirt do phàiste air a bheil ciorram no tinneas-bàis. Thèid e an àite Cuibhreann Ciorraim Bith-beò do chlann ann an Alba a bha air a libhrigeadh roimhe seo le Roinn na h-Obrach is nam Peinnseanan.

Cò as urrainn Pàigheadh Ciorraim Cloinne fhaighinn?

Dh'fhaodadh gum biodh pàiste airidh air pàigheadh ma tha ciorram no suidheachadh slàinte fad-ùine air a bhith orra airson co-dhiù 3 mìosan agus dùil ann gun lean e airson co-dhiù 6 mìosan, mura h-eil iad a' fulang le tinneas-bàis.

Ma gheibh pàiste Pàigheadh Ciorraim Cloinne mus bi iad 16, gheibh iad e gus am bi iad 18, fhad 's a tha iad fhathast a' coileanadh nan riatanasan air a shon. Ma tha am pàiste 16 no nas sine, feumaidh iad cur a-steach airson Pàigheadh Ciorraim Inbheach.

Ciamar a tha ìre a' phàighidh air a h-obrachadh a-mach?

Tha ìre a' phàighidh stèidhichte air 2 phàirt, pàirt cùraim agus pàirt comas gluasaid.

Tha 3 ìrean seachdaineil ann airson cùram:

- as ìsle: £29.20 - tha feum aca air beagan cuideachaidh is taic
- meadhan: £73.90 - feumaidh iad cuideachadh no sùil a chumail orra tric tron latha no air an oidhche
- as àirde: £110.40 - feumaidh am pàiste cuideachadh is taic tron latha agus air an oidhche no ma tha tinneas-bàis orra

Tha 2 ìre sheachdaineil ann airson comas gluasaid:

- as ìsle: £29.20 (do chlann aois 5 is nas sine) - do chlann a dh'fheumas sùil a chumail orra no stiùireadh nuair a ghluaiseas iad timcheall a-muigh
- as àirde: £77.05 (do chlann aois 3 is nas sine) - do chlann nach urrainn coiseachd, cha mhòr nach urrainn gluasad a-muigh, air a bheil fìor chiorram fradhairc no slàinte inntinn no air a bheil tinneas-bàis

Faodaidh clann a gheibh an ìre as àirde den phàirt comas gluasaid an t-airgead gu lèir no pàirt den airgead sin a ghluasad gus càr, sgùtair no cathair-chuibhle le cumhachd fhaighinn air mhàl tron Sgeama Charbadan is Uidheam Ruigsinneach. Chan eil clann fo 3 bliadhna a dh'aois airidh air a' phàirt comas gluasaid.

Cuin a gheibh daoine pàigheadh?

Bidh a' chiad phàigheadh air obrachadh a-mach mar as trice bhon cheann-latha air an deach a' chiad phàirt den iarrtas aca a chur a-steach, air loidhne, air a' fòn no sa phost.

Bithear a' libhrigeadh Pàigheadh Ciorraim Cloinne gach 4 seachdainean an dèidh làimhe. Thèid a' phàigheadh a-steach dhan chunntas a thugadh seachad mar phàirt den iarrtas.

Ciamar a tha am pròiseas iarrtais ag obair?

Tha 2 phàirt sa phròiseas iarrtais. Bidh pàirt 1 a' faighneachd mu fhiosrachadh pearsanta, leithid latha-breith agus seòlaidh. Is ann am pàirt 2 as urrainn don neach-iarrtais innse dhuinn mu shuidheachadh slàinte agus feumalachdan a' phàiste aca.

Ann am pàirt 2, bidh sinn cuideachd ag iarraidh 1 phìos fiosrachadh taice bho phroifeiseantach a dhearbhas gu farsaing ciorram, suidheachadh slàinte no feumalachdan a' phàiste. Mar eisimpleir, planaichean cùram sòisealta, liostaichean òrduighean dhrogaichean agus plana feumalachdan taice a bharrachd aig pàiste. Faodaidh e tighinn bho phroifeiseantaich a' gabhail a-steach luchd-taice, dotairean agus tidsearan.

Faodaidh fiosrachadh taice a bhith a' toirt a-steach breithneachadh-lèigh ma tha fear ann, ach chan eil feum air seo airson iarrtas a dhèanamh.

Cuin a thèid ath-bhreithneachadh a' phàighidh a chumail?

Thèid ath-bhreithneachadh a chlàradh a rèir cuin a bhios sinn an dùil gum bi feumalachdan a' phàiste air atharrachadh. Do luchd-iarrtais air nach eil coltas atharrachaidh air an t-suidheachadh, thèid ceann-latha ath-bhreithneachaidh a chur air bhonn eadar 5 agus 10 bliadhna bho cheann-latha a' cho-dhùnaidh. Leanaidh sinn oirnn a' libhrigeadh Pàigheadh Ciorraim Cloinne rè ath-bhreithneachaidh sam bith.

Sgrìobhaidh sinn chun neach a rinn iarrtas às leth a' phàiste ron treas no còigeamh co-latha-breith aca mura h-eil iad a' faighinn na pàirt comas gluasaid, gus an urrainn dhuinn co-dhùnadh a bheil còir aca air.

Am bi iad airidh air Pàigheadh Teasachadh Geamhraidh do Chlann?

Gheibh clann no daoine òga a bhios a' faighinn na h-ìre cùraim as àirde air co-dhiù 1 latha den t-seachdain airidheachd (a' tòiseachadh bhon treas Diluain san t-Sultain gach bliadhna) am Pàigheadh Teasachadh Geamhraidh do Chlann airson cuideachadh le cosgaisean dachaigh a theasachadh sa gheamhradh.

Am faigh clann a tha a' fulang le tinneas-bàis am pàigheadh?

Gheibh. Bidh pàiste no neach òg air a bheil tinneas-bàis airidh mar-thà air an ìre as àirde den phàirt cùraim agus a' phàirt comas gluasaid bhon a tha iad 3 bliadhna dh'aois, ge bith dè cho fada 's a tha am pàiste no an neach òg sin air a bhith a' fulang tinneas-bàis. Tha pròiseas iarrtais nas luaithe ann ma tha tinneas-bàis air pàiste. Thèid Pàigheadh Ciorraim Cloinne a libhrigeadh gach seachdain ro làimh ma tha tinneas-bàis air pàiste.

Ciamar a nì iad iarrtas?

Gheibhear tuilleadh fiosrachaidh agus faodar iarrtas a chur a-steach air-loidhne aig **mygov.scot/childdisability**. Faodaidh daoine cuideachd cur a-steach air a' fòn no foirm-iarrtais pàipeir iarraidh tron phost le fòn a chur thugainn an-asgaidh air **0800 182 2222**.

Am bi iad airidh air sochairean co-cheangailte?

Faodaidh am pàiste, am pàrant, neach-gleidhidh no neach-cùraim cuideachd a bhith airidh air sochairean, seirbheisean agus tàilleabhan co-cheangailte. Gheibhear barrachd fiosrachaidh aig **mygov.scot/child-disability-payment/related-benefits**.

Ciamar as urrainnear fios a chur thugainn?



Cuir fòn thugainn an-asgaidh air: 0800 182 2222



Seirbheis Text Relay: 18001 +0300 244 4000 (do dhaoine a tha maol sa chlaisneachd)



Luchd-cleachdaidh Cànan Soidhnidh Bhreatainn: contactscotland-bsl.org



Webchat: chat.socialsecurity.gov.scot